

MINISTRU PREZIDÉNSIA KONSELLU MINISTRUS

FIDELIS MANUEL LEITE MAGALHÃES



DISKURSU

IHA SESAUN PLENÁRIA KONA-BA MEDIDA EKONÓMIKA SIRA

Parlamentu Nasionál, Loron 20 Fulan-Outubru Tinan 2020

INTRODUSAUN

Iha tinan 2020 nia laran, ita-nia nasaun hasoru dezafiu istóriku no sein presedente sira. Ita tama ba tinan ne'e ho restrisaun orsamentál ne'ebé forte tebe-tebes. Tuir previzaun, ida-ne'e sei lori ita ba períodu kreximentu ekonómiku negativu seluk ida. Ita moris iha situasaun impase polítika ida-ne'ebé la'ós baibain. Iha fulan fevereiru, COVID-19 deklaradu hanesan pandemia globál. Iha fulan-marsu, mosu kazu dahuluk iha ita-nia nasaun.

Bainhira haree ba situasau ida-ne'e, ita tenke hateke ba kotuk. Ita tenke reziste hasoru tendénsia retrospetiva, atu avalia saida maka akontese ona husi fulan-marsu to'o fulan-maiu ho saida maka ita hatene agora, ho informasaun ne'ebé ita hetan hafoin faktu ne'e. Hanesan ha'u dehan, Timor-Leste nu'udar nasaun ida mós husi nasaun 23 de'it, iha ne'ebé laiha ema ida maka mate tanba COVID. Husi nasaun 23 ne'e, ita nasaun maka nu'udar nasaun boot liu daruak. Iha momentu ne'ebé ita deszeenvolve resposta, ita-nia polítiku na'in sira tau sees tiha sira-nia diferenza sira. Ita-nia sidadaun sira halo tuir regra sira. Sira fase liman, uza máskara no mantein distánsis sosiál. Hanesan ha'u dehan, ita-nia sidadaun sira, maizoumenus, fila daudaun ona ba vida normal. Atu koloka konkista ida-ne'e iha perspetiva, bele haree notísia sira. Ita haree nasaun sira seluk, riku ka kiak, sofre tanba pandemia ida-ne'e, ho número ema mate nian ne'ebé sa'r ba beibeik, *lock down* fila-fila o luta polítika interna. Senáriu ida-ne'e maka, tuir ema barak nia haree, bele akontese iha ita-nia rain. Tanba ne'e maka parseiru dezenvolvimentu nian no embaixada balun evakua sira-nia sidadaun no sira-nia funsionáriu sira. Bainhira hateke fila-fali ba kotuk, ita tenke hanoin mós kona-ba projesaun ekonómika sira iha momentu ne'ebá, ko'alia kona-ba depresaun ekonómika no kolapsu ekonómiku.

Mai ita hanoin fila-fali saida maka akontese iha fulan-abríl ne'e. Karik iha fulan-abríl ita bele haree agora daudaun ita iha ne'ebé, ema mate laiha, ho ita nia moris loron-loron nian fila fali ba normál iha fulan-maiu ka fulan-juñu, ita bele konsidera ida-ne'e hanesan susesu boot ida?

Permite ha'u fó detallu balun ba ita-boot sira kona-ba impaktu negativu sira ne'ebé bele mosu iha momentu ne'ebá no kompara impaktu negativu hirak ne'e ho buat ne'ebé akontese duni. Iha momentu pandemia ne'e mosu fofoun, comunidade internasionál (Índise Risku Global INFORM) prevee ona katak Timor-Leste bele iha tan problema sira kona-ba saúde no ekonomia, no sira-nia número indika ona nivel risku daruak ne'ebé boot liu ba Timor-Leste, iha rejiaun ne'e tomak. Iha momentu ne'ebá, diskusaun internasionál sira mós sujere katak medida sira-ne'ebé Estadu foti bele lori kustu (umanu sira) boot liu fali moras ne'e rasik – liuliu iha nasaun sira iha faze dezenvolvimentu nian hanesan Timor-Leste. Iha nivel inserteza nian ne'ebé boot tebetebes iha fulan-marsu no fulan-abríl, kona-ba xoke saúde nian, ne'ebé rezulta iha eventu katastrófiku sira, ho estimativa kona-ba ema mate maka 390 no 11.700. Ha'u repete fila fali, senáriu aat liu prevee katak mate bele to'o 12.000. Aleinde ne'e, rezultadu negativu sira ne'ebé bele mosu ba ekonomia iha tinan 2020, iha ne'ebé senáriu previzaun nian ida-ne'ebé pesimista hatudu katak Timor-Leste sei monu maka'as iha kreximentu PIB nian, ho -9,3 porsentu (Banku Mundiál, fulan-Abríl tinan 2020) ba tinan ne'e nia rohan.

Faktu husi kestaun ne'e agora maka katak ita evita duni ema mate – ida-ne'e de'it bele kria benefísiu ekonómiku substansiál. Salva no proteje ema nia moris mak importante no ida-ne'e mak polítika ekonómika ida ne'ebé sólidu, ne'ebé ekivalente ho parsela signifkativa ida husi PIB.

Projesaun internasionál sira ikus ne'e prevee agora daudaun katak ekonomia Timor-Leste nian sei sofre kontrasauun besik 6,8 porsentu iha tinan 2020, revizaun ida-ne'ebé iha deklíniu signifkativu boot hamutuk porsentu 9,3. Bele-bele, ida-ne'e akontese tanba medida estabilizasaun ne'ebé hamenus impaktu sira ne'ebé grave liu husi COVID-19. Revizaun ba previzaun sujere katak ba

daudaun ne'e ita hakat liu ona senáriu aat liu, maibé laiha buat ida mak iha serteza bainhira pandemia ne'e seidak menus iha mundu tomak.

Maibé, eziste observasaun fundamentál sira ba projesaun sira-ne'e. Ida, sei iha inserteza barak (medida rekuperasaun nian sira ne'ebé governu sei implementa sei ajuda atu halo kamaan impaktu ba empreza sira no ema-nia moris sira, no iha possibilidade atu onda daruak virus sei tama iha asaun. Daruak, kontrasau ba porsentu 6,8 mós integra ba efeitu sira ne'ebé bele mosu tanba fatór polítiku no ambientál sira (impase polítiku iha inísiu tinan ne'e nian no falta orsamentu estadu nian ne'ebé lori restrisaun ba gastu públiku sira: no inundasaun no udan boot sira), enkuantu sira seluk mosu tanba impaktu xoke sira husi COVID-19. Datoluk, ita la'o daudaun ba aumentu PIB nian iha trimestre datoluk tinan 2020 nian, bainhira atividade sira-ne'e la'o normal fila fali ho lalais liu duke ida-ne'ebé ita espera.

Ita sei avansa neineik iha direasaun ba trajetória atividade ekonómika ne'ebé projeta ba pré-pandemia ba período 2020-2025 (haree figura), ne'ebé sujere katak iha possibilidade efeitu pandemia ne'e nian ba atividade ekonómika sei dura liu fali medida rekuperasaun nian ne'ebó foti governu, no PIB sei rekupera neineik. Mezmuke hafoin risku sira ba saúde bele hamenus, ekonomia sei demora uitoan atu fila fali ba nivel anteriór virus PIB nian, maske bele to'o iha ne'ebá. Projesaun internasionál sira prevee katak taxa kreximentu ne'ebé projeta Timor-Leste sei sa'e ba 3.1% (Banku Mundiál), 3,3% (Banku Aziátiku ba Dezenvolvimentu) ka 4% (FMI) iha tinan 2021, ne'ebé natoon atu rekupera nivel atividade sira husi tinan 2019 (3,9%). Rekuperasaun ne'ebé projeta ba tinan 2021 forte liu duke nivel sira iha tinan 2018 (-0,8%), 2017 (-3,8%), 2016 (3,4%) no 2015 (3,1%). Importante tebes atu nota katak merkadu emerjente sira no ekonomia sira iha faze dezenvolvimentu nian sei bele sofre kontrasau iha tinan ne'e, liuliu Tailândia -8%, Filipinas -7,3%, Singapura 6,2% no Malázia -5%, no sira ne'e bele iha dezempeñu dí'ak liu iha mundu. Rezultadu sira-ne'e iha parte mundu nian sira seluk, bele aat liu fali. Revizaun ba leten husi previzaun kreximentu ne'ebé aas ba Timor-Leste hatudu katak governu la'o hela iha direasaun loos.



Maske agora daudaun la eziste ona kazu COVID-19 nian iha Timor-Leste, maybe família sira sei hamenus sira-nia konsumu no mós espera katak empreza sira sira sei kuidadu didi'ak nafatin no sira sei bele atraza tan desizaun investimentu nian sira. Ho padraun rekuperasaun nian, ne'ebé ekonomista sira bolu rekuperasaun sira ho "forma U" ka "ho forma swoosh", sei hein katak ekonomia sei hatán neineik liu, mézmuke bainhira governu hahú suspende restrisaun sira. Maibé, resesaun foin hatudu ladún grave duke ne'ebé ida-ne'ebé prevee katak bele, tanba normalizasaun ekonómika no ita-nia medida fiskál sira hasa'e kreximentu ekonómiku.

Relatu ne'e fó mai ita instantáneu estensaun ida kona-ba dezlokamentu ekonómiku bainhira COVID-19 atinje Timor-Leste, maske, resesaun koronavírus lori moai bele kamaan no ninia moris parese badak, iha ne'ebé atividade monu iha trimestre 2, maibé ita hein katak rekuperasaun bele hahú iha fulan-agostu no setembru, bainhira ekonomia loke fila-fali ona.

Atu tau iha kontestu, importante atu destaka katak, sein medida sira ka resposta ruma ne'ebé tarde no moderadu husi governu, ema ne'ebé mate no ema moras tanba COVID-19 bele afetamaka'as liu

família, sociedade no economia, no iha tempu hanesan bele aumenta nivel pobreza no dezigualdade nian. Ita konsege kontrola “tempestade perfeita ida” no xoke ekonómiku ne’ebé maka’as liu iha ita-nia istória dezde ukun rasik-an tanba asaun polítika ne’ebé brani no, importante liu, konsensu polítiku ida-ne’ebé forte.

RESPOSTA BA COVID-19

Iha períodu tempu nian ne’ebé badak tebes, Governu gasta ona osan hamutuk US \$ millaun 91,7 hodi implementa medida resposta ekonomika nian hamutuk 19. Iha semana hirak hafoin estadu emergénjia, sentru krize emergénsia nian ida harii; mekanizmu ida hodi finansia ba resposta kria ona; medida sira ne’ebé maka projeta, tau iha debate ativamente no hetan akordu. Lejizlasaun subsidiária implementa ona ho lalais tebes. Iha momentu ne’ebá, nasaun hala’o ho prinsípiu responde di’ak no halo ho responsabilidade, la’ós responde ho perfeitu. Prefeisaun iha ambiente hanesan ne’e la’ós no la posivel. Partidu polítiku hotu-hotu, inklui opozisaun, ho firme koloka nasaun iha prtidu nia leten. Timoroan, husi kamada sociedade oin-oin, hamutuk ida de’it.

Liutiha loron balu hafoin krisaun estadu emergénsia, subsidiu eletrisidade nian implementa no beemoos fornese ho gratuita. Iha tempu ne’e, ita-nia depóziitu aihan mamuk hela. Maske bastesimentu sofre kolapsu makaas iha mundu tomak, ita importa ho susesu foos tonelada 30.000 husi Vietname. Durante períodu ne’e, ita mantein konektividade internasionál liuhusi Darwin. Aviaun kontinua tula ekipa médika no sasan médiku importante sira. Esénsia husi ita-nia resposta maka apoiu osan ba uma-kain sira. Lojístika ba ida-ne’e kompleksa tebes. Intervensaun projeta husi zero. Ita rejista uma-kain sira iha suku hotu-hotu; ita dezenvolve prosedimentu operasionál; ita mobiliza seguransa no transporte; no fundu sira transfere ba BNCTL nian Sukursál Munisipál hotu-hotu. Iha fulan rua nia laran, kada família hahú simu ninia apoiu finanseiru. Atu garante produsaun aihan, Ministériu Agrikultura, Floresta no Peskas distribui dolar millaun ba insumu agríkola. Alunu sira iha rai-liur ne’ebé hela de’it iha uma ita rejista no fó apoiu finanseiru, ezersísiu seluk ne’ebé presiza inisiativa lojístika ne’ebé boot tebes.

Klaru katak medida balun dezafiadora duni. Ita atraza atu estabelese programa sira kona-ba aopiu ba kréditu liuhusi ita-nia sistema bankáriu, no subsidiu salariál hatudu duni katak susar atu implementa.

Klaru katak ita-nia resposta la perfeita. Maibé, karik ita haree liu de’it, itahahú husi zero, husi surat-tahan mutin ida, iha situaun ida-ne’ebé praktikamente la iha rekursu finanseiru, ba debate saudavel ida no akordu amplu ida kona-ba saida maka atu halo, ba mobilizasaun fundu, no ba implementasaun husi medida apoiu ekonómiku nian lubuk ida, iha tempu pandemia no ta’uk nian, ne’ebé implementa hotu liuhusi Ministériu, ajénsia no estrutura emergénsia nian oin-oin.

Ita la’o liu ona dalan ne’ebé naruk hodi aprende katak, aleinde ita bele preene ema mate, intervensaun governu iha saúde pública no iha ekonomia bele halo output ekonomia no kustu konsumu Covid-19 nian la’o ho di’ak. Karik haree didi’ak ita parese hetan ona susesu “hatetuk kurva resesaun nian”. Parese ita-nia pkote medida ekonomia nian hamutuk 19 ajuda ona hodi apoia família no empreza sira, katak ita evita parsialmente resesaun masiva ida ne’ebé sei remata tinan ne’e ho diminuisaun iha PIB porsentu - 9,3.

Iha fulan-agostu tinan 2020, Fundu COVID-19 nian atribui ona orsamentu hamutuk US millaun 91.716.636, iha ne'ebé US \$ millaun 88.274.151 maka gasta ona ba estímulo ekonómiku (88,3%).

Maske iha dezafiu oin-oin, Timor-Leste hetan ona susesu ne'ebé dí'ak tebes iha área saúde no ekonomia. Timor-Leste sei konsideradu hanesan istoria susesu internasionál nian ida kona-ba oinsá ita-nia nasaun responde ona ba krize ekonomia no saúde. Oras ne'e, bele dehann, iha Timor-Leste moris la'o normal fila-fali ona. Ida-ne'e la akontese iha Europa. La akontese iha Amérika Norte. La akontese iha Amérika Sul. No Infelizmente, ida-ne'e la akontese iha Ázia Sul no parte oin-oin Ázia nian.

Haree apéndice ba Ezekusaun Orsamentu.

REKUPERASAUN

Planu rekuperasaun ekonómika ida aprovalu tiha ona, ho foku ba agrikultura, turizmu, abitasaun, edukasaun, saúde, protesauun sosiál no reforma institusionál. Planu ne'e kombina medida ba prazu badak no prazu médiu hamutuk 17 ne'ebé Governu Konstitusionál VIII sei implementa to'o tinan 2023.

Planu ne'e fahe ba etapa rua: etapa dahuluk ninia objetivu maka atu hamenus impaktu COVID-19 nian liuhusi reposta prazu badak (liuliu iha semester daruak tinan 2020 nian), no etap daruak ida ho medida sira médiu prazu nian ba rekuperasaun ekonómika (ne'ebé kobre período tinan 2 to'o tinan 3). Faze dahuluk atu evita lakon empregu, apoia família sira no prevene taka empreza sira – ho objetivu atu mantein nivel konsumu no padraun moris nian. Medida sira ba prazu badak inklui fahe bote nesiedade bázika nian (ka voucher) ho valor \$25 ba kda ema (uza rejistu Uma-Kain), subsidiu rekuperasaun fulan haat ba empreza sira ne'ebé rejista lakon rendimentu, no izensaun kontribuisaun sira ba seguransa sosiál.

faze daruak ne'e atu hatán ba dezafiu sira ne'ebé kauza husi pandemia, no mós ba problema estrutural sira. Faze ne'e kobre area sira hanesan:

- **Agrikultura** (no agro-indústria kí'ik). Foku ba Kafé (liuhusi subsidiu ida hodi apoia renovasaun plantasaun sira) aleinde ai-kameli no ai-teka. Ba oin, Governu prevee implementasaun política substituisaun (parsial) ida ba importasaun, liuliu husi foos.
- **Turizmu**. Ninia bjetivu mak atu kria empreza estadu ida hodi implusiona setór ne'e, hadi'a edukasaun no formasaun profisionál, reabilita infraestrutur (hanesan rezidénsia administradór nian tuan sira no estrada rural sira), no promove ekoturizmu (ho kombina fatin alojamentu nian ho kafé laran ka natar)
- **Abitasaun**. Planu ne'e ninia objetivu maka atu implementa programa abitasaun sosiál nian ida ne'ebé Institutu Nasionál Seguransa Sosiál ka instituisaun foun ida maka sei jere, nune'e bele alkaansa universalizasaun saneamentu báziku, bee no enerjia elétrika iha nasaun laran tomak.
- **Edukasaun**. Ninia objetivu mak atu aumenta proporsauun orsamentu Estadu ne'ebé alokadu ba setór ne'e, aumenta número eskola CAFE sira – nune'e mós rede eskola sekundária, pré-eskolár no sentru formasaun profisionál – no promove manutensaun no rekuperasaun edifisu eskola nian sira.
- **Saúde**. Ninia objetivu maka aumenta gastu rekorente sira hodi hadi'a qualidade serviisu saúde nian, fortalese apoiu finanseiru no tekniku sira ba programa prinsipál sira (hanesan saúde iha família, saúde skolár no saúde iha serbisu) investe iha infraestrutur, no hadi'a formasaun ba pesoál saúde nian.
- **Protesauun Sosiál**. Ninia objetivu mak atu kria mekanizmu pagamentu alternativu (atu evita selu osan direta no hamenus kustu) aumenta kobertura 'Bolsa da Mãe; aumenta protesauun (ezemplu, mate iha rejime la'ós kontributivu) implementa programa empregu ativu nian no avalia viabilidade husi rendimentu báziku universal ida.
- **Aspetu institusionál**. Ninia intensaun ne'e maka aprova lejislasun hotu-hotu ne'ebé pertinente ba kestaun fundiária sira, elabora no aprova lejislasauun empzezariál (hanesan rejime falénsia) hadi'a funsionamentu tribunál sira no reforma administrasauun pública.

- **Instalasaun fibra ótika.** Ninia objetivu maka implementasaun fibra ótika iha nasun laran tomak, liuhusi fiu iha tasi okos ne'ebé liga Timor-Leste ba mundu tomak.
- **Fonte enerjia renovavel, sustentavel no alternativa.** Planu ne'e atu halo promosaun fonte I enerjia renovaven sira – liuliuloro-matan, bee no anin.

SEKSAUN FINÁL: PRAZU NARUK

Pandemia ne'e oferese oportunidade ida ne'ebé importante atu ita aprende. Forsa husi ita-nia povu no ita-nia unidade nasionál ita bele haree momoos. Maibé ida-ne'e akontese mós ho dezafiu ne'ebé ita nafatin enfrenta. Ita-nia prioridade polítika sei habelar objetivu ekonómiku ne'ebé amplu husi Programa Governu Konstitusionál Dauluk nian, atubele harii dalan kreximentu sustentavel nian ne'ebé forte liu no dezvoltimentu ekuitativu.

Dahuluk, ita-nia polítika makroekonómika sei apoia liu dezvoltimentu husi setór produtivu sira (agrikultura, turizmu, petróleu, minerál no manufatura), promosaun setór privadu no fortalese ita-nia sustentabilidade fiskál no indústria finanseira, tuir seksaun 5.1 husi ita-nia programa Governu nian. Ida ne'e mós signifika katak ita sei revitaliza oinsá polítika makroekonómika apoia dezvoltimentu infraestrutura nian, serbisu ba foinsa'e no konstrui rekursus umanus no kapasidade ita-nia instituisaun públika sira nian.

Daruak, sei reforsa no implementa polítika sira hodi garante implementasaun husi asaun no estratéjia sira ba kreximentu sustentavel no dezvoltimentu ekuitativu iha nasaun hotu. Ida-ne'e envolve prioridade imperativa sira hanesan tuirmai, ne'ebé iha relasaun ho Programa Governu nian:

- **Dezvoltimentu agronegósio, peska no turizmu** hanesan setór hirak ne'ebé potenciál tebes atu apoia transformasaun ekonómika país nian iha prazu badak no prazu médiu liuhusi investimentu ba agregasaun ho valór no qualidade dí'ak ne'ebé haree ba merkadu importasaun nian. Ida-ne'e hanesan baze fundamentál ida ba dezvoltimentu ekonómiku no sosiál país nian. Iha oportunidade importante atu aproveita iha tranzisaun husi produsaun subsisténcia nian ba produsaun emprezariál produktu agíikola, pekuária, peska nian (seksaun 4 husi Programa Governu nian).
- **Teknolojia sempre sai hanesan motór prinsipál ba dezvoltimentu.** Tanba ne'e, aproveitamentu ba teknolojia hanesan promesa boot ida ba setór-xave sira iha dezvoltimentu prazu naruk Timor Leste nian, ne'ebé inklui turizmu no komérsiu, hanesan mós ba modernizasaun Estadu no hadi'a prestasaun servisu husi instituisaun públika sira.
- Forsa traballu ida ne'ebé kualifikada maka kondisaun nesesária ba dezvoltimentu ekonómika sustentavel, ne'e impulsiona atuálizasaun qualidade husi produktu no kreximentu husi produtividade, estimula emprendedorizmu no seluk seluk tan. Tanba ne'e, ita sei kontinua hadi'a qualidade husi ensinu no fromasaun profisionál, hodi garante asesu ne'ebé hanesan ba populasaun timoroan hotu iha área ensinu nian (seksaun 2.1 husi Programa Governu nian).
- **Ita sei revitaliza promosaun ba indústria hanesan forsa ne'ebé dudu dezvoltimentu ekonómiku nasionál** (seksaun 4.5 husi Programa Governu nian). Parké Industriál Timor Leste nian ne'ebé planeadu ninia objetivu mak atu atende setór lojístika no armajenamentu tanba ninia pozisaun únika iha korredór ekonómiku prinsipál sira. Ita sei fó apoiu ba setór komplementár sira tuir sira-nia kapasidade atu atende ba objetivu sira husi parké industriál ne'e, hanesan agregasaun valór no diversifikasaun ekonómika, ne'ebé iha ninia parte tenke aliñada ho estratéjia ekonómika no indústria ne'ebé ampla liu.

Apêndice

KÓDIGU	ÁREA POLÍTICA/ESTRATÉJIA	A: ORSAMENTU ORIJINÁL	B: ORSAMENTU NE'EBÉ REVISTU ONA	C: TOTÁL GASTU	D: SALDO/ (B-C)	EZEKUTA ONA (C÷B)
1	Konetividade Transporte nian					
5080601	1.1 Subsídium ba vuu semanál 3 Dili-Darwin (MTCI)	\$585,009	\$1,813,609	\$1,514,836	\$298,773	83.53%
	1.2 Subsídium transporte marítima merkadoria nian (viajen 2/fulan:MTCI)	\$90,000	\$0	\$0	\$0	0%
2	Distribuisaun suprimentu sira					
5890103	2.1 Garante suprimentu foos iha situasaun emerjénsia ho suficiente no halo distribuisaun ho seguru besik MT 19.000 (CNL)	\$18,216,815	\$16,962,500	\$16,500,000	\$462,500	97.27%
	2.2 Apoiu transporte karga durante oras 24 nia laran husi Portu ba armajen (MTCI)	\$180,000	\$0	\$0	\$0	0%
5740501	2.3 Garante produsaun liuhusi akizisaun maihusi agrikultura no peska (fertilizante, semente, nsst.) (MAFF)	\$4,952,522	\$4,952,522	\$2,198,290	\$2,754,232	44.39%
3	Tele-Komunikasaun					
	3.1 Sosa pakote SMS hodi oferese apoiu ba kréditu eletrisidade nian, transferénsia osan no komunikasaun sira seluk	\$0	\$0	\$0	\$0	0%
	3.2 Fornese konektividade ba internet subsidiadu ba estudante ensinu superiór no profesór na'in 67,500 no estudante sekundariu na'in 165,000 (MTCI)	\$600,000	\$0	\$0	\$0	0%
	3.3 Implementa sistema alerta ida hodi buka tuir kazu COVID-19 (MTCI)	\$260,000	\$0	\$0	\$0	0%
4	Neseidade				\$0	
	4.1 Fornese eletrisidade gratuita kada fulan ho valór \$15 ba familia besik 160,555 kada kontadór (MOP)	\$7,686,675	\$0	\$0	\$0	0%
	4.2 Fornese bee gratuita ba uma-kain hotu (MOP)	\$262,680	\$0	\$0	\$0	0%
5	Kréditu (BNCTL)					
	5.1 Implementa programa reeskalonamento (halo fali oráriu) ba pesoál emprestimu no emprezariu iha setor bankaria hotu	\$8,182,500	\$0	\$0	\$0	0%
	5.2 Implementa Fasilidade Kréditu Emerjénsia nianida	\$3,000,000	\$0	\$0	\$0	0%
	5.3 Implementa mekanizmu garantia nian ba importadór Sasán Esensial sira	\$5,000,000	\$0	\$0	\$0	0%
	5.4 Fornese Suporta likidez Prazu Badak nian	\$3,500,000	\$0	\$0	\$0	0%
6	Apoiú Diretu					
5080505	6.1 Fornese pagamentu osan valór \$200 ba uma-kain ida-idak (MSSI)	\$15,000,000	\$66,856,800	\$66,527,692	\$329,108	99.51%
	6.2 Dezeña no implementa pagamentu subsidiu salariál ba beneficiáriu besik 30,000 ne'ebé ne'ebé kobre 60% husi sira-nia saláriu (MSSI)	\$14,688,000	\$0	\$0	\$0	0%
	6.3 Izensaun husi kontribuisaun ba Seguransa Sosiál tantu husi traballadór no empregadór sira (traballadór 30,000) (MSSI)	\$2,448,000	\$0	\$0	\$0	0%
	6.4 Izensaun husi selu aluga propriedade Estadu nian ba ema ne'ebé aluga (MJ)	\$1,217,100	\$0	\$0	\$0	0%
5080504	6.5 Tulun estudante timoroan sira iha rai-liur ho despeza subsisténsia nian (MNEK)	\$2,404,850	\$3,233,696	1,343,100	\$1,890,596	41.53%
TOTÁL		\$88,274,151	\$91,716,636	\$81,031,234	\$10,685,402	88.35%

Nota: despeza balun, hanesan ezemplu, estratéjia 1.1 kobre despeza jerál ba estratéjia sira seluk (2.2 no 1.2). Totál ne'ebé gasta ona refere ba totál Atuál. Kompromisu no Obrigasaun tuir rejistu iha relatóriu Freebalance nian. Orsamentu revistu refere ba ajustamentu ne'ebé halo husi Ministériu Finansas, hatudu valór ne'ebé alokadu ona.